

## Ovatioun fir den neie Buergermeeschter zu Schëndels

Et war fir de Michel Malherbe eng Iwwerraschung, wéi sonnes, den 20. Mäerz 2016, d'Entente vun de Schëndelser Veräiner an déi Schëndelser Awunner eng Ovatioun fir den neie Buergermeeschter organiséiert hunn. Um 16.00 Auer ass et mat Musek a Pompjeeën an engem Cortège ënnen aus dem Duerf an de Schlasshaff zu Schëndels gaang. De Marcel Scheuer als Organisationspräsident huet d'Leit häerzlech begréisst a vum Michel seng fréiere Sportsaktivitéiten, Judo a Football, erzielt an och wéi séier de Michel a seng Famill sech, noodeem se aus der Belsch op Lëtzebuerg komm waren, am Duerf integréiert haten. Zum Ofschloss huet hien am Numm vun de Schëndelser Leit dem Michel eng glécklech Hand an sengem neien Amt gewünscht.



Anschliessend huet de Romain Schaus eng kleng Geschicht virgedroen iwwer den neie Buergermeeschter vu Miersch an de Jong vu Schëndels. De Misch, ass de 16. Dezember 1957 zu Sprimont bei Léck gebuer a koum 1959 mat sengen zwou Schwëstere, sengen Eltere a sengem Monni, sénger Tatta a sengen Kusinnen op Schëndels op den Haff vum Schlass. A jonke Joeren hat hien et fauschtdeck hanner den Oueren a war bal ëmmer derbaï, wann eng Kaz geschleeft ginn ass. Dem Michel sengem Virgänger, dem Albert Henkel, ass grouse Luef ausgesprach ginn. De Romain huet dem Michel nach e gudden Rot mat op de Wee ginn: „Pass op, well den Abbes huet Dinosaurier-Fousstrétt hannerlooss, an et ass net esou einfach, do dran ze trëppelen.“ Duerno huet en him nach alles Guddes gewünscht mat de Wieder „Misch, bleif dee Misch, wéi mir dech all kennen“.

Duerno sinn dem Misch eng Karikatur vum Roger Leiner an en Tableau vun de Schëndelser Schoukanner iwwerrecht ginn, ier den Éierebuergermeeschter d'Schlusswuert gesot huet an d'Feier bei engem Éirewäi mat Schnittercher ausgeklongen ass.

